



Aggustip 26-ani 2014

UKA 2014/60

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Naalackersuinikkut sulinermit aningaasatigut tapiissuteqartarnej pillugu Inatsisartut inatsisaata allanngortinneqarnissaanut Naalackersuisut UKA15-imi allannguutissatut siunnersuuteqaqqullugit peqquneqarnissaannik Inatsisartut aalajangiiffigisassaattut siunnersuut, § 2 naapertorlugu partiinut tapiissutaasartut ersoqatigiinnerusumik agguataarneqarnissaat anguniarlugu, partiimut qinigaasumut tunngaviusumik tapiissutit 800.000 koruuninut annertusillugit, Inatsisartunullu ilaasortaatitamut ataatsimut tapiissutit 150.000 koruuninut annikillisillugit. Aammattaaq partiit nutaat, partii imaluunniit kattuseqatigiillutik qinigassanngortittut sinnerlugit qinigassanngortittup partiimit tunuarneratigut qinigaaffiup ingerlanerani Inatsisartuni ilaasortaatitaqalersut, partiit Qinersisarnermut inatsimmi § 11, imm. 2-4 naapertorlugit qinigassanngortitsisinnaasutut nalunaarutigineqarnerinit atuutilersumik tunngaviusumik tapiissutinik pisinnaatitaalissapput. Allannguut januaarip aallaqqaataani 2016-imi atuutilersinneqassaaq. (Inatsisartunut ilaasortaq Andreas Uldum, Demokraatit)

Tunngavilersuut

Naalackersuinikkut sulinermit aningaasatigut pisortanit ukiumoortumik tapiissutaasartut Nunatsinni partiit isertitarisartagaasa annersarigaat isertuussanngilaq. Tapiissutaasartullu taakku ersoqatigiinnerusumik agguarneqartarnissaat Demokraatit kissaatigaat.

Tamanna minnerunngitsumik Nunatsinni partiit annersaata ukiumi qinigaaffiusumi milioni koruunit sinnerlugu sinneqartooruteqarsinnaasimanerani peqquteqarpoq. Paatsoorniaqinangali; Partiip aningaasaqarniarnerata pitsaasuutinnissaa akisussaassuseqarnertut Demokraatinit isigaarput. Uagut aamma aningaasartuuteqarfiunerpaasartunut, soorlu assersuutigalugu qineqqusaarnermut ataatsimeersuarnissamullu ileqqaarisarpugut.

Tamannalumi 2012-imi sinneqartooruteqarsinnaasinnaasimanitta, 2013-imilu amigartooruteqarnitta nassuiaatissarivaa. Ukiumi ataatsimi aningaasartuuteqarfiulluartunik qinersisoqareernerani 1 million koruuninik sinneqartooruteqarnerup ersersippaa, partiinut aningaasatigut tapiissutaasartut agguataarneqarnerat pissusissamisunngitsoq, tamatuma peqatigisaanik partiit mikinerit - Demokraatit eqqaassanngikkaanni - aningaasaqarniarnikkut ajorluinnartumik inissisimanerat takuneqarsinnaammat.

Taamaammat Demokraatinit sinnersuutigissavarput naalackersuinikkut sulinermit tapiissutaasartut ullumikkumut naleqqiullugit allaanerumik agguanneqartalissasut. Qujanartumillu Nunatsinni partiit annerit marluk - Siumut aamma Inuit Ataqtigiit - tamarmik socialistiskimik/socialdemokratiskimik ingerlatsiniartuupput, peqarnerit tunniussaqaarnerunissaannik eqqarsartuullutik. Partiit taakku marluk aamma ersoqatigiinnissamik suaartaateqartut



siullersariuarpaat. Partiillu annerit saamerliusut taakku marluk oqarluartaarutigisartakkaminnik ilumut timitaleerusussinnaassanersut maanna paasissavarput.

Malittarisassat ullumikkut atuuttut naapertorlugit, partiit Inatsisartunut ilaasortaataqartut 650.000 koruuninik tunngaviusumik tapiissutisisarput kiisalu Inatsisartunut ilaasortamut ataatsimut 210.000 koruuninik tapiissutisisarlutik. Ataatsimullu isigalugu, partiit ukiumut 9.760.000 koruuninik pissarsisarput. Tapiissutillu imatut agguataarsimapput:

Siumut: 3.590.000 koruunit
Inuit Ataqtigiit: 2.960.000 koruunit
Atassut: 1.070.000 koruunit
Demokraatit: 1.070.000 koruunit
Partii Inuit: 860.000 koruunit
Partii Naleraq: 210.000 koruunit.

Immikkullu maluginiagassaavoq Partii Naleraq malittarisassat ullumikkut atuuttut naapertorlugit tapiissutinik tunngaviusunik pissarsisinnaanngimmat, partiip Inatsisartunut toqqaannartumik qinigaatitaqarsimannginnera pissutigalugu.

Agguataarinerup ersoqtigiinnermik tunngaveqarnerunissaa anguniarlugu, partiimut ataatsimut tapiissutit tunngaviusut 800.000 koruuninut qaffanneqarnissaat, Inatsisartunullu ilaasortamut ataatsimut tapiissutit 150.000 koruuninut appartinneqarnissaat Demokraatinit siunnersuutigaarput.

Taamatut agguataarisoqarnera partiit mikinerusut partiinut anginerusunut unammillersinnaassuseqarnissaanut pitsaanerusunik periarfissiissaaq, peqatigisaanillu aningaasat ersoqtigiinnerusumik agguataarneqarnerinik kinguneqassalluni.

Tassunga atatillugu maluginiarneqassaaq, Inatsisartuni partiit tunngaviusumik aningaasartuutigisartagaat, partii angineq mikinerusorluunniit pineqaraluarpata, assigiimmata.

Partiimmi mikinerit anginerillu Inatsisartuni siunnersuutigineqartunut oqaaseqaatissaminnik suliaqartarput, nutserisitsinermut akiliisarput, partiip allattaanik atorfeqartitsillutik nittartakkamik ingerlatsillutik ilaalu ilanngullugit.

Partiit Inatsisartunut ikittuinnarnik ilaasortaataqartut partiillu amerlasuunik ilaasortaataqartut aningaasartuutaasa assigiinnerat paasinarpoq. Taamaammat naalakkersuinnikkut sulinermut aningaasatigut tapiissuteqartarnermut tunngatillugu, partiit mikinerusut ullumikkumut naleqqiullugu isiginiarneqarnerusariaqarput.

Aammattaaq siunnersuutigissavarput, qinigaaffiup ingerlanerani Inatsisartuni partiini qinigaatitaqartuni ilaasortaq ilaasortalluunniit arlariit partiiminnit tunuarnermikkut partiimik



nutaamik pilersitsinerisigut partii Inatsisartuni ilaasortaataqalersoq, partiinut tapiissutinik tunngaviusunik tunineqarsinnaangussasoq. Partiimmi nutaat ilaasortaatitamut tapiissutinik taamaallaat ullumikkut pisartagaqarsinnaatitaapput.

Taamatut inissisimasoqarneranut tunuliaqutaasoq tassaavoq, partiit nutaat taama ittut Inatsisartunut toqqaannartumik qinigaasimangimmata. Aammattaaq partiini pioreersuni ilaasortaasut partiiminnit tunuarlutik partiinik nutaanik pilersitsinissaannut aningaasatigut kajumilersinnginnissaat inatsisiliortut tungaannit kissaatigineqarsimangilaq.

Taamatut aaqjissuussisoqarsimanagera paasilluarparput, illuatungaatigulli aamma oqaatigineqarsinnaavoq Inatsisartunut ilaasortat partiimut aalajangersimasumut ilaasortaanerminnut naleqqiullugu aningaasatigut killilersugaasariaqanngikkaluartut - tamattami eqqaamasariaqarparput Inatsisartunut ilaasortatut nalunneqatiginnissutisinnit taamaallaat pituttugaasussaangatta.

Peqatigitillugu partiit nutaat Kalaallit Nunaanni Inatsisartunut qinersisarneq pillugu Inatsisartut inatsisaanni (Qinersisarnermut inatsit) § 11, imm. 2-4 naapertorlugit ullormit qiniggassanngortitsisinnaasutut nalunaarutigineqarnerminnit atuutilersumik tapiissutinik tunngaviusunik siunissami pissarsisinnaalernissaat siunnersuutigaarput.

Qinersisarnermut inatsimmi aalajangersagaq naapertorlugu, partiit nutaat Inatsisartunut qinersinermi peqataasinnaapput Inatsisartunut qinersinermi kingullermi taasinerit atorsinnaatitaasut tamavimmik 1/31-iisa nalinginik amerlassuseqartunik atsiornernik katersisimagunik.

Matumanilu siunnersuutigineqartoq naapertorlugu, partiip nutaap Inatsisartuni ilaasortaataqalersinnaanissaata qulakkeerneqarnissaa ilimanaateqarpoq, kiisalu aamma qinigaatitaqarnermigut innuttaasunit tapersorneqarnera naatsorsuutigisariaqarluni, taamaattumillu aamma partii pisortanit tapiissutinik tunineqarnissaa tulluartuussalluni.

Peqatigitillugulu aaqjissuussineq aamma ilaasortat ilaasortaatitamut tapiissutaasartunik tapiissutinillu tunngaviusunik pissarsinissaq kisiat siunertaralugu partiimik pioreersut qimannissaannut nutaanillu partiilornissaannut kajumilersinnissaannik annikillisaassaaq, partiip aningaasatigut tapiissutinik pissarsisinnaanissaa kisiat qulakkeerniarlugu partiimik nutaamik pilersitsiniarneq annertoq atsiornernillu pisariaqartunik 1000-it missaanniittunik katersuinissaq - tamatumalu naammassineqarnissaa - takorlooruminaammat.

Siunnersuutigineqartoq akuersissutigineqassappat, partiit ataasiakkaat Inatsisartuni maanna ilaasortaataqarnikkut agguataarsimanerat tunngavigalugu naalakkersuinikkut sulinermut tapiissutinik ima pissarsisinnaatitaallissapput:

Siumut: 2.900.000 koruunit (ullumikkumut naleqqiullugu 690.000-nik ikinnerusunik)

Inuit Ataqatigiit: 2.450.000 koruunit (ullumikkumut naleqqiullugu 510.000-inik ikinnerusunik)



Atassut: 1.100.000 koruunit (ullumikkumut naleqqiullugu 30.000-inik amerlanerusunik)
Demokraatit: 1.100.000 koruunit (ullumikkumut naleqqiullugu 30.000-inik amerlanerusunik)
Partii Inuit: 950.000 koruunit (ullumikkumut naleqqiullugu 90.000-inik amerlanerusunik)
Partii Naleraq: 950.000 koruunit (ullumikkumut naleqqiullugu 740.000-inik amerlanerusunik)

Siunnersuutigisarpur akuersissutigineqassappat, Inatsisartuni ilaasortat partiillu ullumikkut agguataarsimanerat aallaavigalugu, Nunatta karsiata partiinut tapiissutinut ukiumoortumik aningaasartuutigisartagai 9.450.000 koruuniussapput, tamannalu ullumikkumut naleqqiullugu ukiumoortumik katillugit 310.000 koruuninik sipaaruteqarnermik kinguneqassaaq.

Taamaasilluta partiit nammieerlutik siunnersuutip aningaasalersornissaannut ersoqatigiillutik aningaasaliisuunissaat siunnerfigaarput. Nunatta aningaasaqarniarnikkut maanna inissisimanerani sipaarniarqartariaqarlunilu sukannersumik pingaarnersiuisoqartariaqarpoq, taamaammatt naalackersuinikkut sulinermut tapiissutinik qaffaaqqissangaluarutta tamanna naleqqutinngilluinnassaaq.

Tassungalu atatillugu puigussanngilarput, partiinut tapiissutit ukiut arlariit ingerlanerini malunnaatilimmik qaffakkiartorsimmata.

Partiinut tapiissutit ukioq 2000-imi ukiumoortumik 210.000 koruuniupput, partiillu Inatsisartunut qinersinermi kingullermi taasinermut ataatsimut 60 kr.-inik pissarsiaqartarlutik. 2000-imut aningaasanut inatsimmi siunertamut tassunga 2.735.000 kr.-it immikkoortinneqarput. 2014-imullu aningaasanut inatsimmi naalackersuinikkut sulinermut tapiissutinut kontumi katillugit 9.760.000 kr.-it immikkoortinneqarput.

Tapiissutit taamaasillutik ukiut 14-it ingerlanerini 7 mio. kr.-it sinnilaarlugit amerleriarsimapput, agguaqatigiissillugu ukiumut millionip affaata missaanik amerliartorsimallutik.

Ukiumoortumik tapiissutaasartut saniatigut, partiit qineqqusaarnissaminut tapiiffigineqarnissaminik qinnuteqarnissaminut aamma periarfissaqarput.

Siunnersuutitta amerlanerpaanit isumaqatigineqarnissaa Demokraatinit neriuutigaarput.

Pisortanut aningaasatigut allaffissornikkullu kingunerisassat.

Inatsisartuni ilaasortat partiillu maannakkut agguataarsimanerat tunngavigalugu, siunnersuutigineqartoq ukiumoortumik 310.000 koruuninik sipaaruteqartitsissaaq.

Siunnersuutigineqartumut atatillugu inatsisiliornikkut suliassat annikitsunnguupput, inatsisilerinermilu fuldmægtigep ukiumut 500.000 kr.-inik akissarsiaqartup akissarsiaata ukiumut naatsorsorlugit arfinilerarterutaat sinnernaviarnagit, ataasiartumik 80.000 kr.-it missaannik akeqassalluni.



Siunnersuut taamaalilluni ukiumi siullermi sipaarutaasunit akilerneqareersimassaaq.

**Namminersorluni inuussutissarsiuteqarnermut aningaasatigut allaffissornikkullu
ingunerisassat.**

Soqanngilaq.

Innuttaasunut aningaasatigut allaffissornikkullu kingunerisassat.

Soqanngilaq.